

西夏紀事本末

西夏紀事本末卷二十七

烏程張鑑春治甫著

平夏初城

元豐五年春二月進封常樂郡公董璁爲武威郡王以會兵討夏故也時夏人欲與董璁通好許割賂斫龍以西地云如歸我卽官爵一隨所欲董璁拒絕之整甲兵以俟入討且遣使來告帝召見其使令歸語董璁盡心守圉帝知邈川事力固不足與夏人拒但欲解散其謀使不與結和而已

六年是歲帝賜李憲詔曰昔六谷首領羅支廝鐸督輸忠朝廷協力擊賊後終成奇功殺李繼遷於三十九井當時朝廷報賞甚厚今董璁阿里骨旣效誠如此宜更激勉使深入賊土求如上功阿里骨者董璁養子也

七年冬十月夏人寇涇原夏監軍人多零丁用事常率兵出入蘭州安塞之役皆其主謀神宗募人生致之不得時引兵十萬入涇原蕃漢民死者甚眾涇原經畧使盧秉遣姚麟彭孫引兵趨靜邊砦扼其歸路人多零丁戰死獲其器甲以獻

按蔡條叢話以人多零丁爲清唐堯誤

元祐二年夏五月阿里骨及夏人寇邊都監吳猛死之癸丑夏人圍南川砦 秋八月庚子授西蕃首領心牟欽瓊銀州團練使溫溪心瓜州團練使以不從結瓠齧入寇故也丁未岷州將种誼復洮州西蕃大酋領鬼章董璫別將也桀黠有謀所部兵甚銳神宗時數爲邊患至是知夏人之怨失蘭州也與夏人解仇爲援築洮州居之遂合縱寇邊時夏人聚兵于天都山而鬼章亦駐兵常家山前鋒已屯通遠境上軍器監游師雄將先發以制之告於熙帥劉舜卿舜卿曰彼眾我寡奈何師雄曰在謀不在眾關智不關力

此機一失後將噬臍不濟焉願爲首戮三夕而後從之總管姚兕
种誼請分兵兩路急裝輕齎並洮水而進兕部洮西領武勝正兵
合河州熟戶破六逋宗城斬首一千五百級攻講朱城遣人走間
道焚黃河飛橋青唐十萬之眾不得渡誼部洮東以岷州蕃將包
順爲前鋒由哥龍谷會通遠蕃兵宵濟邦金川黎明至洮州城下
版築未收一鼓而破遂擒鬼章青宜結并獲首領五人檻送京師
斬馘數千牛羊器械芻糧以萬計餘眾奔潰溺死者數千洮水爲
之不流於是奏捷曰臣聞膺天威震皇武所以討不庭也今西夏
授策而不謝輒陰援吐蕃鬼章結讐構姦欲爲邊患臣與主帥合
謀將義兵行伐賴陛下聖神陷城克敵斬獲以萬計生擒元惡係
送北闕下願戮尸藁街蠻夷邸聞以示萬里書奏百寮班賀安燾
曰乾順幼豎非秉常近親獨梁乙逋利於持權與梁氏立之其族

黨酋渠善用兵者如鬼名阿吳輩皆秉常族黨多反側願望不若
有以離間之彼阿吳等既不自安一旦得領重兵未必不回戈而
復仇梁氏此一奇也其後夏人自相攜貳使來修貢悉如憲策種
誼之知廓州也夏人將犯延安帥趙高以誼統制諸將賊聞誼至
皆潰鄜延人謂得誼勝強兵二十萬爲熙河蘭岷路鈐轄知蘭州
蘭州與通遠皆絕塞中間堡鄣不相接質孤麻子川田美宜稼皆
棄不耕誼請城納迷堡李諾大柳平結珠龍扼其要害募民耕植
以省饋運於是城李諾平凡二十四日而成賜名定遠

三年秋七月辛亥賜阿里骨詔曰惟爾祖先世篤忠孝本與夏賊
日尋干戈亦惟我朝廷爵秩之隆用能保爾子孫黎民之眾肆朕
命爾嗣長乃師而自承襲以來疆酋外擅爾弗能禁恣其所爲遂
據洪城以犯王略陰連夏賊約日盜邊朕愍屬羌之無辜出偏師

而問罪元惡俘獲餘黨散亡山後底平河南綏服朕惟率酋豪而
捍疆場乃爾世功叛君父而從仇讎豈其本意庶能改過未忍加
兵果因物以貢誠願洗心而效順爾旣知悔朕復何求

七年冬十月丁卯夏人寇環州及永和諸砦凡七日始解去初知
慶州章粦數遣輕兵出討屢有功斬獲部族不敢窺居粦策其必
報乃取黠羌陷以厚利管而遣之若得罪而逸者因使事虜刺其
舉兵所向卽馳歸以告果知羌情將寇環州粦乃選精兵萬餘統
以二驍將使營遠塞而授之策曰賊進一舍我退一舍彼必謂我
怯爲自衛計不備吾邊壘乃銜枚由閒道繞出其後或乘障堡或
伏山谷間伺以擊其歸又以境外皆沙磧近城百里有牛圈所儲
水足以飲人馬乃夜遣寘毒藥虜圍環州數日無所獲而歸所遣
驍將折可適屯師洪德城伺夏師退識其母梁氏旗幟城中鼓譟

而出馳突躡轢虜大敗而去斬首千餘級獲牛馬橐駝鎧仗以萬計過牛圈飲其水且盡人馬被毒而奔迸蹂踐墜塹谷而死重傷而歸者不可勝計梁氏幾不得脫盡棄其供帳襜褕之物而逃前此邊上功狀多虛或以易爲難或奪甲與乙廣張俘級習以爲常秦獨覈實第勞無少欺微倖者不悅頗有謗之者秦不恤也

紹聖三年春二月丁亥夏人寇義合砦三月癸巳夏人圍塞門砦秋八月辛酉夏人寇德靖靈順二砦九月折可適與夏人戰于雞鞞嶺敗之冬十月壬戌夏人寇鄜延陷金明砦戊辰詔被邊諸路相度戒砦要害增嚴守備甲申以知大名府呂惠卿知延安府夏人自得四砦連歲以畫界未定侵擾邊境且遣使欲以蘭州一境易塞門二砦朝廷不許至是又將大舉入寇鄜延經略使呂惠卿諜知之乃制策應十一軍悉屯於城裏與外軍相近部分既

定夏主李乾德奉其母梁氏率眾五十萬大入鄜延渡河至烏延口分爲三路西自順寧招安砦東自黑水安定砦中自塞門龍安砦金明以南二百里閒相繼不絕是月自長城晝夜疾馳至青龍平距府城五里盡圍諸寨而以輕兵與諸將戰賊亦爲十一寨其二在金明北其九在金明南列營環城乾順子母親督桴鼓縱騎四掠知麟州有備復還金明而後騎之精銳者留龍安邊將悉兵掩擊不退初賊欲以重兵圍延州而後南掠鄜州及至延州見有備欲攻則城不可近欲掠則野無所有欲戰則諸將按兵不動欲南則有腹背受敵之患留二日卽拔寨北去攻陷金明砦守兵二千八百惟五人得脫城中糧五萬石草千萬束皆盡惠卿遣將追之賊以精騎殿而不奔第四將張輿及李淮戰死諸將不敢擊先是七月閒阿里骨以夏人師期來告賜詔曰阿里骨累據熙河路

經略安撫司等奏及近淮進奉揭失納余龍到闕累以夏人情狀傳報朝廷事具悉卿嗣有封域世爲藩垣而能屢覘敵情密陳邊計緬惟誠篤深眷余懷至是帝聞有夏寇泰然笑曰五十萬眾深入吾境不過十日勝不過一二砦須去已而果破金明引去旣去留一書寘漢人頸上曰貸汝命爲吾投經略使處其言曰夏國昨與朝廷疆場小有不同方行理究不意朝廷改悔卻與坐團鋪處立界本國以恭順之故亦屢勉聽從遂于境內立數堡以護耕而鄙延出兵悉行平蕩又數數入界殺掠國人共憤欲取延州終以恭順止取金明一砦以示兵鋒亦不失臣子之節也延帥呂惠卿上樞密院而不以聞十二月乙亥夏獻金明之俘於遼

四年春正月甲午涇原路鈐轄王文振敗夏人于沒煙峽二月丙寅夏人寇綏德城三月壬戌夏人犯麟州神堂堡出兵討之進築

胡山砦庚午夏人大至葭蘆城下知右州張構等擊走之辛巳西
上閣門使折克行破夏人于長波川斬首二千餘級獲牛馬倍之
初克行居行間無所知名賊寇慶州种諤拒之令河東出師爲援
克行請行爲先鋒戰葭蘆川以功遂知府州西夏久窺河外克行
每出必勝賊畏之 夏四月庚子知保安軍李沂伐夏國破洪州
環慶鈐轄張存入鹽州俘戮甚眾及還夏人追襲之復多失亡甲
辰知渭州章棗城平夏鞏以夏人猖獗上言城葫蘆河川據形勝
以偪夏朝廷許之遂合熙河秦鳳環慶鄜延四路之師陽繕理他
砦數十所以示怯而陰具版築守戰之備出胡蘆河川築二砦于
石門峽江口好水川之陰夏人間之帥眾來襲棗迎擊敗之二旬
又二日城成賜名曰平夏城靈平砦棗檄知鎮戎軍□□固守
鎮戎時四路之兵無慮三十萬聽命于棗以總管王文振爲統制

以折可適爲前軍而副之前軍遇敵求援可適請文振益兵發熙河卒二千人失道盡赴坑谷死文振懼歸罪可適劾其擅興違制奪十三官而罷秦請留之乃以可適權第十三將而趙隆爲第九將與夏人戰隆功爲多其涇原路第一將則劉仲武子文也夏人欲犯天聖砮主帥檄仲武會兵約過某日賊不來則分屯去仲武得賊的期乞緩分屯主帥止留一將及仲武軍賊果至仲武力戰禦之賊乃遁去遂遷仲武熙河路兵馬都監時李顯忠亦爲鄜延路兵馬都監兼充第六正將西戎入寇顯忠屢擊之自是無敢犯塞章惇因請絕夏人歲賜而命沿邊諸路相繼築城于要害以進拓境土凡五十餘所六月丁酉環慶路安疆砮成甲辰熙河進築青石峽成詔賜人役及防拓軍兵緡錢有差尋賜名西平 秋八月己酉彗星見西方鄜延經略使呂惠卿復宥州惠卿乞諸路出

長樂使討擊詔河東環慶並聽惠卿期約遂遣將官王愍攻破宥州尋又奏築威戎威羌二城加惠卿銀青光祿大夫時章惇肆開邊隙故諸道興役進築屢被爵賞

元符元年春二月戊辰知蘭州王舜臣討夏人于塞外築興平城三月丙辰米脂砦成丙子築熙河通會關夏五月呂惠卿帥師使劉安苗履破夏人于大沙堆六月夏遣使求援于遼丙戌遣官分詣鄜延涇原河東熙河按驗所築城砦冬十月夏人寇平夏渭州之西地數百里而平夏處其中初涇原經略章綏謂諸將曰新邊控扼誰可付者皆曰非郭成不可遂辟成爲第十一將以戊平夏西賊自失地之後朝夕憤恚至是以兵號三十萬犯塞國主與其母自將攻平夏城自己卯至壬辰晝夜疾攻成等城守益堅寇乃造高車以臨城載數百人填壕而進俄有大風震折寇一夕

遁去戎母慙憤勢面而還章秦追擊獲其勇將鬼名阿里西壽監
軍妹勒都通斬獲甚眾夏人震駭阿里西壽妹勒都通二人者乃
西羌之將皆勇悍善戰屢爲邊患朝廷密詔圖之秦知其虛可襲
會二酋以放牧爲名窺伺境上十二月遣折可適郭成等閒以輕
騎二千衛枚捷走出盪羌六道分進寇不及知夜入其室執之盡
得其家屬俘馘三千餘人獲牛羊不啻十萬種羌震懾計其地卽
天都山也可適因請以秋葦川爲砦南牟爲州詔名砦曰臨羌州
曰西安而以可適知州事曾布白上此非常之功可賀上曰可賀
否布曰鬼章亦賀及告陵廟此功不在鬼章下惇等皆曰此奇功
也捷至帝御紫宸殿受百官賀案在涇原日久嘗言夏嗜利畏威
不有懲艾邊不得休息宜稍取其土疆如古削地之制以固吾圉
然後諸路出兵擇要害不一再舉勢將自蹙矣因召知府州折克

行間策克行條具所見遂以師出界分遣諸將約束爲深入窮討之狀賊疑不敢動遂城葭蘆時河東進築八砦通道廊延帥秦希甫至議築先後克行請以兩路兵同時深入先築遠者出賊不意帥用其策卒城之蓋章惇與棗同宗言多見采由是劍州一城砦九屢敗夏人進築西安城於天都山建西安州而諸路亦多建城砦以徧夏及是有平夏之捷夏人不復振矣十一月辛酉夏復遣使求援于遼

二年春二月甲申夏人以國母喪遣使來告哀且謝罪詔卻其使因進章棗等官秩鬼名阿里等至闕下並貸其命 秋九月庚子朔夏國遣使來

西夏紀事本末卷二十七

西夏紀事本末卷二十八

烏程張鑑春治甫著

契丹婚媾

雍熙三年初西夏臣宋有年賜姓曰趙春二月癸卯繼遷叛宋始來降遼遼授以定難軍節度使銀夏綏宥等觀察處置使特進檢校太師都督夏州諸軍事弟繼沖爲副使遂復姓李是爲遼聖宗統和四年也冬十月遣使貢于遼十二月李繼遷率五百騎款遼境言願昏大國永作藩輔

端拱元年春三月癸未繼遷遣使貢于遼

二年春正月壬辰李繼遷與兄繼捧有怨乞與遼通好遼主知其非誠不許壬辰繼遷貢于遼戊戌遼以王子帳節度使耶律襄之女封義成公主下嫁繼遷賜馬三千匹

滔化元年春正月繼遷遣使如遼謝三月丁丑繼遷遣使貢于遼
秋九月壬辰繼遷遣使如遼獻宋俘 冬十月丙午繼遷以大
敗宋軍如遼告十二月癸卯繼遷下宋麟州等州使告于遼十二
月庚戌遼遣使封繼遷爲夏國王

二年春二月丙午夏國遣使告伐宋之捷於遼 夏四月乙亥夏
國王李繼遷遣杜白如遼謝封冊 秋七月繼遷以復宋銀綬二
州告于遼 冬十月壬申夏國王李繼遷遣使上宋所授敕命於
遼丁丑繼遷之兄定難軍節度使李繼捧自宋附遼授開府儀同
三司檢校太師兼侍中封西平王仍賜推忠效順啟聖定難功臣
十二月遼始聞夏國王繼遷潛附于宋初夏州李繼遷叛宋請附
于遼遼招討使韓威請納之旣得繼遷諸夷皆從未幾以山西
城邑多陷奪兵柄李繼遷受宋賂潛懷二心至是遼命德威持詔

率兵往諭之

三年春二月乙丑朔日有食之韓德威奏繼遷託以西征不出德威至靈州俘掠以還庚寅夏國以韓德威俘掠遣使告于遼遼賜詔安慰 冬十月壬申夏國王遣使貢于遼

五年遼以夏人梗邊皇太妃受命蕭撻凜總烏古及永興宮分軍討之

至道元年春三月癸丑夏國遣使貢于遼 秋八月丙子夏國遣使如遼進馬 冬十二月辛巳夏國以敗宋師遣使告于遼 初宋永安節度使折御卿病遼謀知之韓德威復爲繼遷所誘遂率眾入邊以報子河汭之役御卿輿疾而出德威聞之遂頓兵不敢進

二年春正月丙寅夏國遣使貢于遼

三年春二月丙午夏國遣使貢于遼三月己巳夏國破宋兵遣使告于遼己卯遼封夏國王李繼遷爲西平王夏六月壬子夏國遣使如遼謝封冊冬十二月夏國遣使貢于遼

眞宗咸平元年春二月庚子夏國遣使貢于遼

三年冬十一月甲戌朔遼授西平王李繼遷子德明爲朔方節度使

四年春三月乙亥夏遣李文貴貢于遼夏六月戊午夏國奏下宋恆環慶等三州于遼遼賜詔褒之

五年春正月甲寅夏國遣使貢馬駝于遼夏六月夏遣劉仁勛告遼下宋靈州

六年夏五月丁巳西平王李繼遷薨其子德明遣使告于遼先期於行宮左右下御帳設使客幕次於東南至日北面臣僚各常服

其餘臣僚並朝服入朝使者至幕次有司以嗣子表狀先呈樞密院准備奏呈先引北面臣僚并矮敦已上近御帳相對立其餘臣僚依班位序立引告終人使右入至丹墀而殿立引右上立批少前拜跪奉訖宣問若嗣子已立恭身受聖旨奏訖復位嗣子未立不宣問引右下丹墀而北鞠躬通班畢引而殿再拜不出班奏聖躬萬福再拜出班面謝天顏復位再拜出班謝遠接復位再拜贊祇候退就幕次再入依前北面鞠躬通辭再拜敘戀闕再拜贊好去禮畢六月己卯贈繼遷尙書令遣西上閤門使丁振弔慰 秋九月己亥夏國李德明遣使如遼謝弔贈

景德元年春三月乙未李德明遣使如遼上繼遷遺物 秋七月

甲申遼遣使封夏國李德明爲西平王 冬十月己酉德明遣使

如遼謝封冊

二年春二月丁巳夏國遣使告遼下宋青城

三年遼以耶律唐古爲西南面巡檢歷豪州刺史禁姦民鬻馬于夏界

四年秋七月壬申西平王李德明母薨遼遣使弔祭甲戌遣使起復

大中祥符二年夏四月遼於中京大定府設來賓館以待夏使凡西夏國進奉使至遼朝見儀臣僚常朝畢引使者左入至丹墀而殿立引使者上露臺立揖少前拜跪附奏起居訖俛興復位閣使宣問某安否鞠躬聽旨跪奏某安俛伏興退復位引左下至丹墀而殿立禮物右入左出畢閣使鞠躬通某國進奉使姓名候見共一十七拜贊祇候平立有私獻過畢揖使者鞠躬贊進奉收訖贊候引左上殿就位立臣僚使者齊聲啜酒三行引使左下至丹

幄謝宴五拜畢贊有勅宴五拜祇候引右出禮畢於外賜宴客省
伴宴仍賜衣物西夏朝辭儀常朝畢引使者左入通某國某使祇
候辭再拜不出班起居再拜出班總闕致詞復再拜賜衣物謝恩
如常儀若賜宴五拜畢贊好去引右出 冬十二月辛卯遼皇太
后崩于行宮壬辰遣使報哀于夏

三年秋九月乙酉遼使冊西平王李德明爲夏國王

五年夏四月壬寅夏國遣使進良馬於遼 冬十一月己亥遼賜

夏國使東頭供奉官曹文斌呂文貴竇珪祐守榮武元正等爵有
差

六年秋七月乙未遼西南招討使政事令斜軫奏党項前後叛
多投西夏西夏不納上怒欲伐之遂詔李德明今党項叛我欲西
伐爾當東擊毋失犄角之勢八月壬戌遼遣引進使李延宏賜夏

國王李德明及義成公主車馬

天禧二年夏六月戊午吐蕃王并里尊奏凡朝貢乞假道夏國從之

五年冬十一月癸未夏遣使貢於遼

乾興元年秋九月壬寅遼遣堂後官張克恭充夏國王李德明生日使

天聖四年冬十月庚辰遼遣使問夏國五月與宋交兵之故

六年夏六月遼以吳克荷充賀夏國王生辰使

九年夏六月己卯遼聖宗崩興宗卽位甲申遣使告哀于夏 秋

九月庚申夏國使遼奉慰 冬十月丁酉夏國遣使賻於遼十二

月是歲遼以興平公主下嫁夏國王子元昊以元昊爲夏國公

馬都尉

明道元年冬十一月丙戌夏國遣使賀遼席聖節辛卯夏國王李德明薨冊其子夏國公元昊爲夏國王

二年春正月乙酉夏遣使貢于遼 冬十二月己酉遼禁夏國使沿路私市金鐵

寶元元年春三月辛亥夏遣使貢于遼 夏四月己巳遼以興平公主薨遣使于夏問故

康定元年秋七月乙丑宋遣郭禎以伐夏報遼

慶曆元年春正月庚戌遼遣南院宣徽使蕭符末翰林學士劉六符使宋問興師伐夏二月知保州王果言遼人潛與元昊相結

冬十二月壬子遼禁吐渾党項鬻馬于夏國詔沿邊築寨以防之三年春正月辛未遼遣同知析津府事耶律陞烈樞密院都承旨王惟吉諭夏國與宋和二月己酉夏國使遼賀加上尊號甲寅耶

律敵烈等使夏國還奏元昊罷兵遼卽遣使報宋 夏四月庚子
夏遣使進馬馳于遼 秋七月庚寅夏遣使上表于遼請伐宋不
從 冬十月壬子夏人侵党項遼遣延昌宮使高家奴讓之自是
遼夏連兵數載

至和元年春正月戊子夏遣使貢方物于遼 夏五月己巳夏乞
進馬馳于遼遼主命歲貢之壬辰夏遣使貢于遼 秋七月己巳
夏遣使求昏于遼 冬十月夏進誓表于遼

二年遼興宗崩遣使報哀于夏道宗卽位二月甲寅夏遣使如遼
賀加尊號 秋九月遼以先帝遺物賜夏

三年夏四月夏遣使如遼會葬

八年春正月遼禁民鬻銅於夏

英宗治平二年夏五月夏遣使貢于遼

四年冬十一月夏遣使進回鶻僧金佛梵覺經于遼十二月夏國
主諒祚薨

神宗熙寧元年春二月壬子諒祚子秉常遣使報哀于遼三月丙
子遼遣使弔祭乙未秉常上遼以其父遺物 冬十月戊申遼冊
秉常爲夏國王廿二月辛亥夏遣使貢于遼

二年七月乙丑朔日有食之戊辰夏國遣使如遼謝封冊 冬十
一月戊申夏遣使如遼乞賜印綬

六年冬十一月壬辰夏遣使貢于遼

九年春三月辛酉遼太后殂癸亥遣使報哀於夏戊寅遼以太后
遺物遣使遺夏夏六月夏遣使如遼弔祭

元豐二年冬十月戊戌夏遣使貢于遼

五年六月夏遣使貢於遼

八年春二月己巳夏國獲宋將張天二遣使獻俘于遼 夏六月
丙辰夏遣使貢于遼

八年冬十月戊辰夏國主秉常遣使于遼報其母梁氏哀

哲宗元祐元年冬十月丁亥遼以夏國主李秉常薨遣使詔其子
乾順知國事己亥夏國主乾順遣使上其父遺物于遼

三年秋七月丙辰遼遣使冊乾順爲夏國王

四年夏六月夏遣使如遼謝封冊

紹聖二年冬十一月甲辰夏國進貝多葉佛經于遼

元符二年春正月己酉遼詔夏國王李乾順伐拔思等部 冬十
一月乙酉夏國以宋罷兵遣使謝遼

三年冬十一月戊子夏國王乾順遣使于遼請尙公主

徽宗建中靖國元年春正月遼道宗殂天祚卽位改元乾統二月

乙未遣使告哀于夏 夏四月丙申夏遣使如遼慰奠 冬十二
月丁酉夏遣使如遼賀

崇寧元年夏丙午李乾順復遣使于遼請尙公主壬子李乾順爲
宋所攻遣李造福田若水求援于遼

二年夏六月辛酉乾順復遣使於遼請尙公主 冬十月庚申夏
遣使求援于遼

三年夏六月甲寅夏復遣李造福田若水如遼求援

四年春正月乙亥夏復遣李造福等至遼求援且乞伐宋丁酉遼
遣樞密直學士高端禮等諷宋罷伐夏兵三月壬申遼以族女南
仙封成安公主下嫁夏國王李乾順 夏六月甲戌夏遣使如遼
謝及貢方物 冬十二月己巳夏復遣李造福田若水求援于遼
癸酉宋遣林洙如遼議與夏約和

五年夏六月辛巳夏遣李造福等如遼謝冬十一月宋與夏通好

大觀二年夏六月壬寅夏李乾順以成安公主生子使告于遼
三年春三月戊午夏以宋不歸侵地復遣使告遼

四年夏六月癸未夏遣李造福等貢于遼

政和元年夏六月戊戌夏成安公主朝于遼
三年夏六月丙辰夏國貢于遼

西夏紀事本末卷二十九

烏程張鑑春治甫著

遼人救援

元祐元年冬十月丁亥遼遣使詔夏國主秉常子乾順知國事時遼道宗大安二年也

三年秋七月丙辰遼遣使冊李乾順爲夏國王

四年夏六月甲寅夏遣使如遼謝封冊

七年夏六月乙丑夏國以朝廷屢次征伐遣使乞援于遼

紹聖三年冬十二月乙亥夏遣使獻金明之俘于遼

元符元年夏六月夏遣使求援于遼 冬十一月辛酉復遣使求援于遼時以鬼名阿里及妹勒都逋見獲於章棗故也

二年春二月甲申夏人以國母喪遣使來告哀且謝罪卻其使戊

子鄭延鈴轄劉安敗夏人于神堆夏人告敗于遼以求援三月丙辰遼人爲夏故來請緩師遼主遣僉書樞密院事蕭德崇來爲夏人議和仍獻玉帶蕭德崇等見上遂言北朝皇帝敢告南朝皇帝西夏事早休得卽甚好上令荅之曰西人累年犯順理應討伐何故遣使德崇等唯唯而退其國書略曰粵惟夏臺實乃藩輔累承尙主迭受封王近歲以來連表馳奏稱南兵之大舉入西界以深圖懇求救援之師用濟攻伐之難理當依允事貴解和蓋遼之于宋情重祖孫夏之於遼義隆甥舅必欲兩全于保合豈知一失於緩存而況于彼慶曆元豐中曾有披聞皆爲止退盜謂輒違先旨仍事遠征倘蔽議以無從慮造端之有自因詔遣郭知章報聘築環慶定邊城 夏四月辛卯遼汎使蕭德崇回復書曰載書藏府固和好於萬年使節馳軺達誠心于二國旣永均於休戚宜共嫉

夫兇姦惟西夏之小邦乃本朝之藩鎮曲加封殖俾獲安完雖于北嘗豫婚媼之親而在南全居臣子之分函容浸久變詐多端爰自累歲以來無復事上之禮賜以金繒而不及加之封爵而愈驕殺掠吏民圍犯城邑推原罪惡在所討除聊飭邊防稍修武事箠據要害扼控奔衝輒于去歲之冬復驅竭國之眾來攻近塞凡涉兩旬自取死傷數以萬計糧盡力屈眾潰宵歸更爲詭誕之詞往求拯救之力狡猾之甚于此可知采聽之間固應洞曉必謂深加沮御乃煩曲爲勸和示以華緘將之聘幣禮雖形于厚意事實異於前問緬料雅懷誠非得已願于信誓殊不相關惟昔興宗致書仁祖諭協力蕩平之意深同休外禦之情至欲全除使無噍類謂有稽于一舉誠無益于兩朝祖宗詒謀斯爲善美子孫繼志其可弭忘今者詳味縟詞有所未諭輒違先旨諒不在茲如永念于前

徽宜益敦于大信相期固守傳示無窮矧彼夏人自知困蹙哀祈請命屢叩邊關已戒封疆之臣審觀情僞之狀倘或徒爲空語陰蓄姦謀暫示柔伏之形終懷窺伺之志則決須討伐難議矜容若出自至誠深悔前罪所言可信聽命無違卽當徐度所宜開以自新之路載惟聽達必亮惻怍方屬清和冀加葆裔續遣使人諮謝以次又回劄子曰夏國自李繼遷之後建國賜姓莫非恩出當朝所有疆土並是當朝郡縣之地昨自元豐以來累次舉兵犯塞中間亦曾赦其罪戾加以封冊許令朝貢兼歲賜金帛又遣官與之分畫疆界而狡詐反覆前來於陝西河東作過不一無非母子同行舉國聚兵攻圍州軍城寨去冬又於涇原路攻打城寨近二十日攻賊之人被殺傷者不啻萬數勢窮力屈方冒遁歸比之日前意過不爲不重以此逐路邊臣各須出兵討逐捍禦及於控扼賊

馬來路修築城寨禦其犇衝夏人自知罪惡深重乃更構造詭詞飾非文過干告北朝求爲救助緣南北兩朝百年和好情義至厚有同一家夏國犯順罪惡如此在北朝所當共怒兼詳慶曆四年興宗皇帝致書仁宗皇帝云蠢爾元昊早負貴朝疊遣林牙齋詔問罪尙不悛心近誘過邊民二三百戶今議定秋末親領師徒直臨賊境又云恐因北軍深入御附貴朝或再乞稱臣或依常作貢緬惟英晤勿賜允從又慶曆五年書云元昊縱其兇黨擾我親鄰屬友愛之攸深在蕩平之亦可又云藩服亂常式貢修之不謹親鄰協力務平定以斯宜又皇祐元年再報西征云元昊伺窺邊事特議討除再幸邊方欲殲元惡而夏國馳告元昊云亡嗣童未識於矜存狡佐猶懷於背誕載念非緣逃戶可致親征熟料兇頑終合平蕩苟有稽於一舉誠無益於兩朝至皇祐二年報西征回則

云爰自首秋親臨寇境先驅戰艦直濟洪河尋構浮梁洎成戍壘
六軍蓄銳千里鼓行又云專提騎旅徑趨臬巢郡牧貨財戈甲印
綬廬帳倉敖駝橐之餘焚燒殆盡螫毒尋挫噍類無遺非苟竄殘
全除必去又云兼於恃險之津已得行軍之路時加攻擾日蹙困
危雖悔可追不亡何待載想同休之契頗協外禦之情深惟北朝
興宗皇帝惇篤勸和情義兼致方夏人有罪則欲協力討除及西
征勝捷則馳書相慶慮彼國稱臣修貢則欲當朝勿賜允從今來
兩朝歡好歲久契義日深在於相與之心宜有加于前日今乃以
夏人窮蹙之故詭詞干告既移文計會又遣使勸和恐與昔日興
宗皇帝書義稍異況所築城寨並無與北朝邊界相近之處卽非
有違兩朝信誓必料北朝臣寮不曾檢會往日書詞及所立誓約
子細間達尋具進呈奉旨據夏人累年於當朝犯邊作過理合討

除況今來旨是驅逐備禦於兩朝信誓及久來和好殊不相干兼
夏人近以事力困窮見累次叫關諭命且云國母喪亡姦臣授首
欲遣使告哀謝罪緣夏國久失臣節未當開納今以北朝遣使勸
和之故見令邊臣與之商量及緣夏人前來曾一面請款一面犯
邊慮彼當計窮力屈之時暫爲恭順以緩我邊備候邊臣審察見
得情僞若依前狡詐內蓄姦謀俟後少蘇復來作過則理須并禦
及行討伐若果是出於至誠服罪聽命亦當相度應接許以自新
初德崇堅乞國書內增退休兵馬還復土疆等語往復議論卒不
從德崇留京師凡三十七日乃歸丁酉築威羌城戊戌築鄜延河
東路暖泉烏龍砦章惇乞退遂徑出居僧舍其家已先出帝乃令
約攜行李勿受惇乞解機務章奏 夏五月以進築畢功赦陝西
河東先是夏人三遣使至鄜延而謀言梁氏之死乃北遼遣人醜

殺之使乾順自理國事呂惠卿以謂若誠有之則北朝欲西人之歸已可知我若應荅太迂所求難與則是怒彼以堅之北歸而畫河爲界必無聽從之理乃上疏曰兩敵之所以在河外者以有河南爲之限所以有河南者以有橫山爲之阻今若畫河爲界則皆失之彼豈不思一葦可渡而據山之險他路臣不能知如本路所築九寨與暖泉金湯二寨幸皆就緒東西殆千里而新築之外更拓二三十里以爲堡鋪則形勢膏腴占據殆盡乾順因其母死歸咎姦臣殺之以謝罪而請入貢則我雖未能一舉而覆巢穴然自有國以來用兵西方未有如今日之盛也是春夏人又四遣使來其詞滋恭朝廷亦得其近土首領道其密謀以爲急則納土北歸遂命呂惠卿說諭漸示接納之意庚戌築鄜延金湯城癸亥建西安州及天都等砦六月庚辰賜蘭會州新砦名會州城甲午賜環

慶路之字平關戊戌築定邊白豹城訖工 秋九月庚子朔夏人
來謝罪樞密院言西人近寇涇原狼狽遁歸計窮請命理難便收
假令異日許和亦當畫河爲界旣而遣使三至乃詔呂惠卿諭以
謝表止是虛文若將首謀二人先執以獻方敢受表 冬十二月
庚子夏人屢敗遣其臣令能崑名濟等來謝罪且進誓表略曰伏
念臣國起禍之基由祖母之世蓋大臣等僭竊之事故中朝興平
伐之師今母氏殂殞姦臣誅竄故得因馳哀使附上謝章願追列
祖之前猷特賜曲全之大德仍通常貢獲紹先盟丁未詔曰勅夏
國主乾順省所上表具悉爾國亂常歷年於此迨爾母氏復聽姦
謀屢興甲兵擾我疆場天討有罰義何可容今兇黨殲除爾旣親
事而能抗章引慝冀得自新朕嘉爾改圖姑從矜貸已指揮諸路
經略司令各據巡綽所至處明立界至并約束城寨兵將官如西

人來侵犯卽不得出兵過界爾亦當嚴戒緣邊首領毋得侵犯邊境候施行訖遣使進納誓表當議許令收接至是來上誓表有飭置吏而永絕爭端誠國人而常遵聖化若違茲約則咎凶再降倘背此盟則基緒非延等語壬寅答詔曰爾以兇黨造謀數干邊吏而能悔過請命祈紹先盟爾之種人亦吾赤子措之安靖乃副朕心嘉爾自新俯從厥志爾無爽約朕不食言所宜顯諭國人永遵信誓除置界並依已降詔旨以諸路人馬巡綽所至已立界墩之處爲界兼遼川青唐已係納土歸順各有久來界至今來並依漢界及本處部族有逃叛入夏國者卽係漢人並其餘應約束事件一依慶曆五年正月二十二日誓詔施行自今後恩禮歲賜並如舊例自是西陲之民少安是歲夏改元永安

三年夏帝崩徽宗登極賜夏國主銀絹詔曰詔夏國主朕欽承

命嗣守丕基眷西土之世臣實本朝之蕃衍宜推慶賜昭示寵恩
今差左藏庫副使李昭琪賜登極銀絹具如別錄至可領也故茲
詔示想宜知悉夏熱比平安好否書指不多及 冬十月賜夏國
主曆日詔曰詔夏國主朕始承天命恭授人時眷言西陲世稟正
朔乃前嗣歲誕布新書俾我遠民咸歸一統尙遵時令益林政經
今賜元符四年曆日一卷至可領也故茲詔示想宜知悉冬寒比
平安好否書指不多及 冬十二月又賜進登位土物回詔曰西
夏國主省表具所賀登位并差人進奉御馬一十四匹長進馬二百
匹駝一百頭事具悉朕丕承七聖光宅萬邦眷西土之世臣效本
朝之貢職黃朱布乘陪隸在廷備見悃誠彌嘉恭恪其差來人所
賜物色亦具賜目故茲詔示想宜知悉冬寒比平安好否書指不
多及

西夏紀事本末卷二十九

西夏紀事本末卷三十

烏程張鑑春治甫著

二蔡構釁

元符三年春三月王瞻留鄯州縱所部剽掠羌眾攜貳森摩結等諸侯帳謀反瞻擊之悉捕斬城中羌積級如山詔弃鄯湟州初王瞻諷諸羌酋籍勝兵者皆涅其臂無應者籤羅結請歸帥本部爲倡瞻聽之去遂嘯聚數千人圍邈川夏眾十萬助之城危甚苗履姚雄帥所部來援圍始解

徽宗崇寧元年年夏改元貞觀

二年夏五月王厚與童貫及諸將議曰南宗寨在州之北距夏國卓羅右廂監庫司百里而近夏人交構諸羌易生邊患今若城之可以控制夏人

三年春三月壬寅童貫王厚帥大軍發熙州遣知通遠軍潘逢權領湟州知會州姚師閔權領蘭州控禦夏國邊面 夏四月庚午王厚過湟州並夏國東南境上耀兵巡邊 秋九月初蔡京使王厚招夏卓羅右廂監軍仁多保忠厚言保忠雖有歸意而下無附者章數上不聽京責厚愈急厚乃遣弟詣保忠還爲夏邏者所獲遂追保忠赴牙帳厚以保忠縱不爲夏所殺亦不能復領軍政使得之一匹夫耳何益於事京怒令以金帛招致之夏乃點兵延渭慶三路各千騎出沒聲言假兵于遼而朝廷用京計又命西邊能招致夏人者毋問首從賞同斬級令陶節夫經制陝西河東五路在延安大加招誘夏主遣使異請皆拒之又令殺其放牧者夏人遂入鎮戎略數萬口而去既而又遣渭川蕃落兵士翟勝持檄抵鎮戎軍城下自稱詰斥蔡京蔡卞主權故京卞必欲舉兵討之

因此檄也於是羌酋溪賒羅撤居臨哥城誘夏國入寇合兵逼宣威城下塞知鄯州隴右都護高永年用知河州劉仲武爲統制發五萬人禦之出西寧城未三十里而賊至仲武欲持重固壘永年易賊迎戰遂大敗永年帳下親兵皆所招納蕃部熟戶也遠執永年以叛多羅巴謂其下曰此人奪我國使我宗族漂落無處所遂殺之探其心肝以食焉已而溪賒羅撤羌眾復焚大通河橋以叛新置大震事聞帝怒親書五路將帥劉仲武等十八人姓名勅御史侯蒙往秦川逮治仲武亦引咎自劾長流嶺表命未下會復與夏人戰傷足帝聞之免赴貶所

四年春閏二月夏屢遣使請昏於遠至是遠封族女爲成安公主嫁夏國王李乾順遠夏以鐵錢爲兵器若雜以錫鉛則脆而不可用詔從之三月夏遂乘勝犯熙河城中羸卒僅四千城主楊維忠

以便宜發常平錢募敢死士虜有善礮者所擊樓櫓摧折維忠以一矢遺之賊大駭乃開門出敢死士接戰時韓世忠在行間夏以重兵次蒿平嶺世忠出間道部敢死士死鬪一騎士銳甚問知爲駙馬兀朮世忠手斬之而還樞密院言鄭延路經略司奏已收復銀州乞賜名詔依舊先是陶節夫議出師城銀州官屬皆不願至有引永樂事以爭者又曰夏人東出不過至麟府此去不逾旬奈何節夫曰我計之熟矣夏人必西趨涇原諸君不我從當以二子與士卒同死生遂選耿彥端爲都統制而節夫二子隨行疾驅至銀州夏眾來拒者猶萬人我師旣陣一擊而敗遂城之五日而畢夏人果趨涇原擾蕭關築事泊聞城銀州亟引兵來爭城成已幾月矣事聞節夫彥端各遷一官是月夏人攻塞門砦 夏四月辛未遷遣其僉書樞密院蕭良來爲汎使言朝廷出兵侵夏國今茲

大遼以帝妹嫁夏國主請還所侵夏地又遣樞密直學士高端禮來聘並爲夏人請罷兵也蔡京謂虜書悖慢答書甚峻上令易之曰夷狄當示包容今西邊方用兵不宜開北隙遣翰林學士林摠報之戊寅夏寇臨宗砦己丑夏人寇順靈砦鄜延路第二副將劉延慶擊破之生擒賞屈并熙河招到僞王子益麻党征復攻湟州北蕃市城知州辛叔獻等擊卻之冬十一月林摠使遼因蔡京密諭見遼主跪上國書仰首日夏人數寇邊朝廷興師問罪以北朝屢遣講和之使故務合容今踰年不進誓表不遣使賀天靈節又築虎徑嶺馬練川兩堡侵寇不已北朝若不窮詰恐非所以踐歡和之意也

五年春正月辛丑遼又遣知北院樞密使蕭得里底知南院樞密使牛溫舒來諷歸所侵夏地三月乙卯許夏人平廢銀州爲銀川

城罷五路經制司徒陶節夫知洪州 秋七月夏人納款李乾順
奉表謝罪詞極恭順答詔略曰除先朝所畫之疆損崇寧新取之
地時知樞密院張康國奏詔內難爲帶北朝遣使和解之語上曰
北朝於夏國以此爲恩若不言及疑中國不信乃詔夏國其城堡
誓表至則賜之夏又言故事地界先定載于誓言所以守之也未
肯進誓表八月以與夏通好遣禮部侍郎劉正夫如遼報聘
大觀二年夏五月以復洮州功賜蔡京玉帶六月甲午以平夏城
爲懷德軍 冬十二月夏人入貢秦州觀察使知府州折克行沈
勇有力在邊三十三年戰功最多夏人畏其威名號折家父
四年春正月丁卯夏人入貢

西夏紀事本末卷三十一

烏程張鑑春治甫著

橫山進築

政和元年秋九月童貫既得志于夏遂並輕遼

三年夏六月丙辰夏國貢於遼

政和四年冬十二月以童貫爲陝西經略使初環慶蕃將李遇昌及其父環州定遠大首領夏人李訛哆以書遺其國統軍梁哆陵曰我居漢二十七年每見糧草轉輸例給空券方春末秋初土有飢色若徑搗定遠唾手可取既得定遠則旁十餘城不攻而下矣我儲穀累歲掘地藏之大兵之來斗糧無齎可至而飽也哆陵遂以萬人來迎轉運使任諒先知其謀募兵盡發窖穀哆陵圍定遠失所藏越七日訛哆遂以其部萬餘歸夏夏主築城底河城故詔

童貫爲經略以討之

五年春正月童貫遣熙河經略使劉法將步騎十五萬出湟州秦鳳經略使劉仲武將兵五萬出會州貫以中軍駐蘭州爲兩路聲援仲武至清水河築城屯守而還法與夏右廂軍戰于古骨龍人敗之斬首三千餘級兵馬鈐轄趙隆以奇兵擣之虜大潰二月庚午以童貫領六路邊事時永興鄜延環慶秦鳳涇原熙河各置經略安撫司以貫統領之於是西兵之柄皆屬於貫三月夏人寇邊秋九月王厚與劉仲武合涇原鄜延環慶秦鳳之師攻夏臧底河城敗績死者十四五秦鳳等三將全軍萬人皆沒厚懼重賂童貫匿不以聞未幾夏人深入過定邊軍築城佛谷口名洪夏軍知西安州种師道率眾往平之師初臨城渴甚師道指山之西麓曰是當有水命工求之得水滿谷夏人以爲神時姚平仲年十八從

從父在軍斬獲甚眾賊不能支軍中號之爲小太尉夏人大掠蕭關而去 冬十月戊午夏人入貢是歲夏改元雍寧

六年春正月童貫使劉法劉仲武合熙秦之師十萬攻夏仁多泉城城中力守撥不至乃降法受而屠之又使知渭州种師道節制諸道兵往城席葦平方庀工而賊全至据瓠蘆河堅壁老我師師道陣河澚若將決戰者使人揚言曰援兵至矣賊方疑顧而楊可世潛軍其後姚平仲以精甲衷擊之賊大潰斬首五千級獲橐駝馬牛萬計其酋僅以身免卒城而還又詔師道率陝西河東七路之師征臧底河城期以旬必克旣薄城下虜守備甚飭官軍稍怠小校有據胡牀自休者立斬之尸於軍門令諸將曰今日城不下當視此眾股粟旣而登城卽潰去師道世衡之孫也 冬十一月夏大舉攻涇原靖夏城時久無雪夏先使數萬騎繞城踐之塵

起漲天乃潛穿濠爲地道入城中城遂陷屠之而去

七年春都統制种師道與殿前劉延慶步軍劉仲武出蕭關夏人棄永和割杏兩城而遁師及鳴沙無所見而還以師道爲保靜軍節度使 秋七月壬辰熙河環慶涇原地震旬日不止壞城壁廬舍居民壓死者甚眾夏人圍丁星原築平陽驛令古仁多泉及靖夏制戎伏羌等城

重和元年春二月夏人寇邊將官張迪死之

宣和元年春三月童貫出師收割牛城至蕭關古骨龍砦斥池置烽燧扼據要害謂可制賊死命逼使熙河經略使劉法取朔方法不欲行貫強遣之曰君在京師時親受命於上前自言必成功今乃以難告何也法不得已乃引兵二萬出至統安城遇夏主弟察哥率步騎爲三陣以當法前軍而別遣精騎登山出其後大戰移

七時前軍楊惟忠敗入中軍後軍焦安節敗入左軍朱定國力戰自朝至暮兵飢馬渴死者甚眾法乘夜遁比明走七十里至盍米崦守兵追之法墜崖折足乃斬首而去是役也喪師十萬貫隱其敗而以捷聞使百官入賀議者切齒而莫敢言受賞者數百人關右爲之擾然察哥見法首惻然語其下曰劉將軍前敗我于古骨龍仁多泉吾嘗避其鋒謂天生神將豈今日爲一小卒梟首哉其失在恃勝輕出不可不戒遂乘勝圍震武震武在山峽中熙秦兩路不能餉自築城三歲間知軍李明孟清皆爲夏所殺至是城又將陷時陝西轉運使劉韜攝帥事出奇兵敗之圍乃解察哥曰勿破此留作南朝病塊遂自引去時諸路所築城砦皆不毛夏所不爭之地而關輔爲之蕭條矣夏人來言國主願納款謝罪人疑其詐韜謂兵興累年中國尙不能支況小邦乎此實情也何疑哉卽

受其使因密疏以聞朝廷許其自新 夏四月丙子朔日有食之
庚寅童貫以种師道劉仲武劉延慶將鄜延環慶兵入西界至蕭
關大破夏人取永和砦割踏砦鳴平其三城又破于震威軍辛丑
進輔臣官一等五月丙辰敗夏人於靈武六月己亥夏人遣使納
款詔童貫六路罷兵初夏人恃橫山諸族帳強勁善戰故用以抗
中國慶曆間姚嗣宗首發收橫山之議范仲淹用之既而元昊納
款元豐間种諤亦以爲言故興靈州之師及王師失利之後李憲
始獻進築之議神宗厭兵不克行童貫本出憲之門欲成憲志政
和以來合諸路兵出塞進築遂得橫山地夏國失所恃乃因遣人
納款請和且以誓表進許之前所未有也 秋七月甲寅以童貫
爲太傅夏人之納款也童貫因關右旣困實諷之使來及夏遣使
來賀天寧節授以誓詔夏使辭不取貫不能屈但嚴迫館伴強之

使持還及境弃之道中而去延安帥賈琬得而表上之賈始大沮
尋加太傅封涇國公

西夏紀事本末卷三十一

西夏紀事本末卷三十二

烏程張鑑春治甫著

武朔來歸

宣和二年遼天慶十年金天輔四年也是歲夏改元元德

四年夏六月夏主使李良輔將兵三萬救遼金將幹魯婁宿敗之于宣水追至野谷澗水暴至夏人漂沒者不可勝計是月遼主耶律洎殂遼人立其妻蕭氏爲太后 秋七月辛未夏國遣使如遼問遼主起居八月金阿骨打追襲天祚于國崖擒其都統蕭規天祚脫身去及夏國引兵數萬襲天德軍阿骨打遣偏師七千擊破之

五年夏五月夏主李乾順遣使請遼主臨其國遼主從之中軍都統蕭特烈等切諫不聽遂渡河次于金肅軍北遣使冊乾順爲夏

國皇帝人情惶懼不知所爲特烈陰謂耶律元直曰事勢如此億兆離心正我輩效節之秋不早爲計柰社稷何乃共劫遼主第二子梁王雅里走西北部三日遂立爲帝改元神曆金遣使如夏時幹離不趨天德聞夏迎護遼主遼主已渡河乃遺書于夏使執送遼主且許割地

六年春正月甲戌夏遣把里公亮奉誓表請以事遼之禮稱藩于金且受割賜之地黏沒喝承制割下寨以北陰山以南乙室邪刺部吐祿濼西之地與之自是兩國信使不絕三月辛未夏國王李乾順進誓表于金閏月戊寅朔金賜夏國誓詔辛巳命置驛上京春泰之間 秋七月遼主延禧復渡河居于突呂不部八月乙卯譚稹罷復以童貫領樞密院事兩河燕山路宣撫使初金人以拓跋故地雲中二千里遺夏止以武朔二州來歸至是夏人舉兵侵

武朔二州地界宣撫使譚稹遣李嗣本禦之兵數交夏人未退聽
又金人以朝廷納張穀不給糧遂攻蔚州穀守臣陳詡陷飛狐靈
邱兩縣逐應州守臣蘇京等絕山後交割意朝廷罪稹措置乖方
詔致仕以貫代之貫約遼主延禧來降自往迎之

七年春正月癸酉朔夏遣使如金賀乙未夏遣使如金奠幣及賀
卽位 冬十月壬子夏遣使如金賀天清節己酉金以宗翰經略
西夏

欽宗靖康元年春金遣使宗翰如夏許割天德雲內金肅河清四
軍及武州等八館之地約攻麟州以牽河東之勢 夏四月戊戌
夏人因金兵克朔州亦應粘罕之約遂由金肅河清軍渡河乘虛
盡取天德雲內河東八館之地因攻震威城攝知城事兵馬監押
府谷朱昭募驍銳兵卒千餘人夜縋兵分數隊身先士卒驅眾直

薄其營鼓譟乘之夏酋悟兒齊介胃持千盾邀昭曰大金約我夾
攻自河以北大金得之自河以西我國得之京師太原旦暮且下
麟府諸壘悉已歸我公何恃而不降荅曰新君卽位聖政日新汝
輩未知耶乃宣登極詔書示之眾皆貽愕城上鼓譟賊軍驚亂震
威距府州三百里最爲孤遠諸城旣先下賊怒獨不得昭遂約金
人併力來攻降將有與昭故人者語之曰天下事已矣忠安所施
昭曰食人之祿死人之事汝旣背義偷生不異犬彘尙敢以言誘
我乎今日我惟有死耳因大罵矢石亂下賊眾散走然賊晝夜攻
城不止後二日城有攻摧處昭智思出入禦之皆得法眾莫不恟
懼已而下城坐於廳事召諸軍議曰城且破妻子不可爲賊汙汝
等幸先殺我家出城血戰勝則迺遷西圖大功不勝則暴骨吾境
內大丈夫平生事畢矣因盡殺其家人納之井中副將賈宗將母

過前昭呼曰媼我鄉人也吾不欲手刃請自入井媼從之而軍士
有家屬在城中者亦皆自殺之昭因謂其眾曰我與汝輩俱無累
矣倘我先死汝有得脫者願馳至府谷言我今日事會部落子有
陰與賊通者告之曰朱昭與其眾各殺其妻子將出戰人雖少皆
死士也賊大恐以利啗守陴者果得登城昭知之勒軍士于通衢
接戰自暮達旦尸填街不能行遂於城所摧處躍馬出馬蹶墮城
壕中賊兵四集雷譟曰得朱將軍矣賊始欲生致昭昭瞑目仗劍
無一人敢向者既知不可得矢爭發昭罵賊而死年四十六昭字
彥昭在震威能與士卒同甘苦以是士心感奮凡圍百日而賊陷
既而粘罕遣將希尹以數萬騎陽爲出獵奄至天德逐夏人復奪
夏國所割天德雲內河東八館武州于是絕好惟金肅河清二軍
在大河西不能取之夏人請和金人執其使

秋九月夏人陷西

安州 冬十月甲辰朔夏遣使如金謝誓詔戊午夏遣使如金賀

天清節十一月丙寅夏人陷懷德軍初經略使席賁

按南宋書賁作席賁

賾

知懷德軍劉銓銓奉檄即日就道夏人素聞銓名乃屯兵綿互十里而圍之銓晝夜脩戰守之備賊百計攻城銓悉以術破之後矢盡糧絕銓度力不支乃同通判杜翊世聚焚府庫環牙兵爲三匝出戰譙門中官軍殲焉翊世同妻張氏義不受辱遂火其室舉家死于烈焰中翊世自縊死銓欲自裁已爲敵所執夏太子遣人置之別室將官之銓罵曰我寧死願肯降賊耶我苟不死決不貸汝遂遇害契丹故將小鞠鞞者自其國滅奔于西戎至是招集叛亡雜胡羌數十萬攻麟府諸城至建寧寨兵纔數百知寨楊震與其子居中執中死之長子沂中從征河朔獨免

高宗建炎元年秋金粘罕自草地歸至雲中遣楊天吉約夏人同

取陝西將以所得宋地賜夏國夏人從之粘罕已嘗渝盟于夏國而夏人又從之者蓋夏人非不知和好不可恃其時金勢方盛脅而從之亦欲因而擄掠耳 冬十月辛未夏遣使如金賀天清節自是年至天會十二年凡八年無不同是歲夏改元正德

西夏紀事本末卷三十一

西夏紀事本末卷三十三

烏程張鑑春治甫著

世輔南還

高宗建炎二年春正月丙戌朔夏遣使如金賀天清節庚子以主客員外郎謝亮爲陝西撫諭使持詔書賜西夏主乾順從事郎何洋爲太學博士偕行洛索旣得長安遂鼓行而西隴右大震夏人謀知關陝無備遂以宥州監軍司檄至延安府自言大金以鄜延判隸本國須當理索若敢違拒當發兵誅討鄜延經略使王庶口占檄詞報曰咨爾貪利之臣何國蔑有意意夏國躬蹈覆轍比聞金人欲自涇原徑擣興靈方切爲之寒心不圖尙欲乘人之急幕府雖士卒單寡然類皆節制之師左支右梧尙堪一戰果能辦此何用多言徑檄興中府夏人遂不敢復言時韓世忠以御營左軍

統制升定國軍承宣使鄜延路副總管加平寇將軍至銀州夏人嬰城自固世忠斬關殺其將擲首陣外諸軍乘之賊大敗會王庶亦遣諜聞其用事臣李遇夏人竟不出夏六月以王庶權陝西制置使會主客員外郎陝西撫諭使謝亮西入關庶移書言夏國爲患至小而緩金人爲患至大而迫閣下能仗節督諸路協同義舉亦可徐圖恢復夏人秋稼未登飢餓疲困何暇興兵庶可保其無它亮不聽遂自環慶入西夏夏國主乾順已稱制倨見之亮留夏國幾匝月乃與約和罷兵更爲鈞敵禮乾順許之亮歸夏人隨之以兵掩取定遠軍明年亮乃還行在秋七月金人間宗澤卒決計用兵河北諸將欲罷陝西兵併力南伐河東諸將不可曰陝西與西夏爲隣事重體大兵不可罷左副元帥宗瀚曰初與夏人約夫攻宋而夏人弗應而耶律大石在西北交通西夏吾舍陝西

而會師河北彼必謂我有急難將乘閒竊發以牽制吾師非計也
宜先事陝西略定五路既戡西夏然後取宋議久不決奏請於金
主金主曰康王當窮其所往平宋當立藩輔如張邦昌者至陝右
之地亦未可置而不取也乙巳命洛索平陝西

紹興元年春三月金兀朮陷鞏洮河樂蘭廓積石西寧州白是涇
原熙河二路皆爲金有 夏四月金間耶律大石在和州之域恐
與夏人合遣使索之夏國報以境土不相接亦不知大石所往

秋八月壬辰詔夏國曆日自今更不頒賜

二年秋八月乙巳德安圍解李橫自夏來圍德安金族誅契丹統
軍諸將河東八館五百戶山金司兀寶王府南北王府四部族衙
諸契丹相溫酋首率衆議起亡入夏國兀寶至雲中余覲微覺父
子以遊獵爲名遁入夏國夏人問以兵幾何云親兵三百遂不

納投韃靼

四年冬十月庚午朔宋趙哲將慕洧以環慶附於西夏十二月川
陝宣撫副使吳玠奏夏國主數通書有不忘本朝之意粘罕既取
遼將謀夏國夏陰爲備久矣忽求釁於夏言欲馬萬匹夏人從其
請先以所練精兵每一馬以二人御之給言於金人曰萬馬雖有
然本國乏人牽攏今以五千人押送請遣人交之粘罕遣人往取
皆善騎射者其實欲以窺之也至境未及交馬夏人羣起金國之
兵悉斃夏人復持馬歸國粘罕氣沮自是不敢西向發矢矣

五年春正月己巳金主殂熙宗卽位癸酉金遣使告哀於夏及報
卽位 冬十二月癸亥金始定齊高麗西夏朝賀賜宴朝辭之儀
是歲夏國改元大德

六年春正月己巳朔夏遣使如金賀元旦自是無歲不然乙酉西

夏遣使賀金主萬壽節自是至天德元年凡十四年無不同

八年冬十月鄜延故將李世輔以二十六人奔夏世輔者綏德青
澗人唐至五代世爲蘇尾九都巡檢其父同州觀察使永奇及其
家二百口悉爲金人所屠初世輔爲鄜延路兵馬都監兼充第六
正將西戎入寇屢擊敗之自是無敢犯塞

九年春三月夏人乘折可求之喪陷府州 夏六月初夏國主所
遣鄜延岐雍經略安撫使李世輔欲從乾順借兵伐延安以復仇
世輔鄉里鄰於夏境夏人服其家世久矣及至夏人甚喜遣翰林
學士楊某郊勞禮意良厚楊推誠世輔亦其誠自是無彼我之閒
楊暇日語及金人自得志中原恃其強盛陵亦有并吞之
意知君雄傑故深相結納將倚爲用適有閒自延安來報自世輔
之西金人卽飭兵分捕世輔家屬二百口無長幼悉斬之會大雪

世輔中夜自挈酒壺過楊延之臥內相與籌酌世輔因泣數行下具言父母妻子之亡切齒疾首恨不卽死願得二十萬人生擒撒离喝取陝西五路歸于夏世輔亦得報不共戴天之仇楊惻然翌日爲世輔請於夏主夏主曰爾能立功則不靳惜兵時有酋豪號青面夜叉者有騎射數萬恃勇桀驁要索無厭擾邊十餘年矣夏國患之願國中無能制之者以是令世輔圖之世輔欣然自任問須兵幾何世輔曰嘗以計取得精銳五百足矣夏主曰此虜未易輕圖與騎三千命襄積卷甲晝夜疾驅旣逼其境遇行者俘以自隨奄至其穴乃伏騎于旁聞阜間譟其三面虜倉卒惶駭野又者金冠鐵面具畫如鬼物號野叉未幾野叉持大刀跨馬名赤龍指呼布陣世輔謂之曰汝徒恃犬羊眾實不勇果勇能與我挑戰乎野叉問世輔曰汝爲誰世輔曰因汝不臣其主汝主有請大

國命我伐汝無多言速出戰野又怒揮刀躍馬而前世輔豫戒一騎我與之交馳從旁過之及鋒未接一騎出焉野又顧視問世輔伺隙投搶手捽其背野又身偃仆遂挾以歸其徒窘迫潰走伏兵乘之衆悉降夏主大悅將妻以女世輔辭以父喪卽益兵出二十萬騎以文臣王樞武臣嚠訛爲陝西招撫使輔之以世輔爲延安招撫使鼓行而東世輔所至無不望風迎降獨延安閉門拒守世輔謂之曰吾之此來止求捕害親者若得其人當於延安之人何憾焉已而兵馬都監薛昭綬城見世輔曰吾嘗捕者蘇常柳仲二人耳俄有捕二人以獻者世輔詰之遽言蓋其仇也因剖心以祭時金人已還宋河南地簽書樞密院事樞弟出朝廷赦書以示世輔未之信有耿煥者與世輔有舊爲言眞詔也世輔取赦文觀之因與官屬南望列拜大哭遂說夏人南歸夏人多懷土獨其願

從者二千人來見王樞嚅訛諭之曰世輔已得延安府見講和招撫可以本部軍歸國嚅訛不從曰初經略乞兵來取陝西今既到此乃令我歸耶世輔知勢不可乃出刀斫嚅訛不及擒王樞縛之樞才入境卽望關遙拜言夏國主感聖恩將遣使入貢既而夏人以鐵鷂子軍來世輔以所部拒之馳揮雙刀所向披靡夏兵大潰殺死蹂踐無慮萬人獲馬四萬匹世輔揭榜招兵每得一入予馬

一匹旬日間得驍勇少壯者萬人乃復擒害其父母弟姪者斬于

南宋書五月丙午鄜延副將李東市率部下二千人南來至行在世輔自夏國率所部二十人來

歸賜名顯忠字君錫以軍功遷保信監國節度使淮南北京畿河

北選鋒招討金吾將軍加大尉隴西開國公卒年六十九夏國有芝生於後堂國主乾順作靈芝歌俾中書相王仁宗和之丁亥乾順崩諡曰聖文皇帝廟號崇宗子仁孝嗣立宋以其屬金廢封冊

秋八月乙亥樓炤奏以保安軍寇成知環州帝曰陝西沿邊控制夏國最爲險要當擇久在軍中者己未帝又諭大臣曰夏人乍臣乍叛尤難保持今日邊防尤不可忽 冬十月甲寅樞密行府準備差遣王晞韓以夏國招撫使王樞至行在樓炤言陝西新復正與夏國爲鄰此等留之無益還之可使知恩乃詔閣門引見令臨安府燕犒差行在官館伴秦檜又召樞至都堂諭以講和意并還近所獲夏國之俘百九十人歸之仍命晞韓伴送至境上晞韓興化軍人宣和六年進士樓炤宣撫關陝辟爲屬改京秩朝廷欲借兵西夏犄角金人至是管押生番人口歸夏道無疏虞嘗和宣諭陝西方庭實詩云誰憐定遠不生還驛騎翩翩出漢關未言西風回馬首要傳飛檄過千山其風趣如此 冬十月癸酉夏遣使如金告喪十二月金主以胡盧馬爲招討使提點夏國市場

文獻通考

三十三
臣繼乾順而立者正史作天祈建炎以來朝野襍記
作仁孝未知孰是鑑案今諸史均作仁孝當是也

十年春三月丙申宋命胡世將與夏人議入貢夏人不應夏五月
夏人侵金金詔張奕往征還奏曰折可求世守麟府以抗夏人我
朝有其地遂以與夏夏夷折氏墳隴而戮其屍折氏怨入骨髓而
不得報今復守晉寧故激怒夏人欲開邊釁以雪私讎金遂移折

氏守青州

西夏紀事本末卷三十四

烏程張鑑春治甫著

得敬亂邦

紹興十年春正月丁丑夏遣使如金賀正旦癸巳夏遣使如金賀萬壽節自是無歲不然是時夏主仁孝初立改元大慶夏五月金復取河南陝西地己卯金詔冊夏李仁孝爲夏國王夏人復侵金金命右監軍撒離合出河中趨陝西六月金平陝西秋九月庚申夏遣使如金謝贖贈戊辰夏遣使如金謝封冊

十一年春正月己未西夏遣使如金請置榷場金主許之夏四月金慕容洵破新泉寨又攻會州將官朱勇卻之勇在會州嘗與夏人戰擒其驍將由是知名冬十二月癸巳夏遣使如金賀受尊號

十二年春三月夏國地震逾月不止地裂泉湧出黑沙歲大饑乃立井里以分賑之

十三年春正月己丑朔夏使如金金以皇太子喪不御正殿使詣皇極殿遙賀乙巳夏使賀金萬壽節如正旦儀時夏人始立學校於國中又立小學於禁中夏主親爲訓導 冬十二月以明年改

元人慶

十五年秋八月時夏人重建太學親釋奠設弟子員賜子有差

十六年春正月庚寅金以邊地與夏國是歲夏尊孔子爲文宣帝

十七年是歲夏改元天盛按陳氏紀元要略當在十九年中俟再攷策舉人始立唱

名法 鑄天盛元寶錢

十八年春二月壬子金以哥魯葛波古等爲橫賜夏國使 是歲

夏復建內學選名儒主之增脩律成賜名曰新律

十九年冬夏使如金賀明年正旦使中道遣還

二十年春正月乙巳金以廢立事報諭西夏金除胡盧馬鎮夏國
鞬靬沿邊招討提點兩國市場 秋七月戊戌夏遣使如金賀卽
位及受尊號

二十一年春正月戊子金主生辰夏遣賀自是至大定元年無歲
不然 秋九月金以脩起居注蕭彭哥爲夏國生日使 冬十月
丁未宋傳檄出師討金

二十二年秋九月丙午金以吏部郎中蕭中立爲夏國生日使

二十三年金改元貞元春正月朔金主不視朝詔有司受夏貞獻
秋九月丁亥金以翰林待制謀良虎爲夏國生日使

二十四年春正月甲寅朔金主不豫不視朝夏使至金者賜館燕
三月夏遣使賀金遷都

二十七年夏四月戊戌金以宿直將軍溫敦幹喝爲橫賜夏國使
秋九月乙丑金以宿直將軍僕散烏里黑爲夏國生日使

二十八年秋九月庚午金以宿直將軍阿魯保爲夏國生日使是
歲夏始立通濟監鑄錢

二十九年春丙辰朔金遣兵部尙書蕭恭經畫夏國邊界 夏四
月南宋歸朝官李宗閔上書有西夏亦與金人爲讐而金人亦素
畏之金人嘗割天德雲中金肅河清四軍及八館之地以賂夏人
矣丁未之歲伊實郎領萬騎陽爲出獵而直犯天德逼逐夏人悉
奪其地夏人請和金人執其使者臣是時久留雲中人情忿然因
得出入雲中副使李屈移謂臣曰昔年大金賂我四軍八館俾我
出軍牽制關中合從以攻南宋及其得志首叛盟約某昔年兩使
南朝其禮義文法非它國之比自是觀之則西夏惡金人喜中國

可知王子之歲尼堪聞蜀地富饒欲提兵親取令雲中副留守劉思恭條陳書傳所載下蜀故事及圖畫江山形勝銳然欲往夏人聞雲中聚兵以爲攻己舉國屯境上以備其來而尼堪亦不敢出兵止遣薩里干等以兵攻饒風今莫若遣辨士諭以盟約俾以重兵出境上爲吾聲援 秋九月金以宿直將軍加古撻懶爲夏國生日使

三十年冬十二月西夏王仁孝之嗣位也國中多亂其臣任得敬抗禦有功遂以爲相封楚王

三十一年秋八月癸亥金以太常博士蕭誼忠爲夏國生日使冬十月宋傳檄遼夏高麗渤海諸國出師共討金人先是於紹興元年吳玠爲鎮西軍節度亦嘗遣人通信夏國四年亦如之至是四川宣撫使吳玠因以檄告契丹西夏

三十二年春三月癸亥夏兵二千餘騎至菜園川俘掠又二百餘
騎寇馬家巉 夏四月乙亥夏遣使如金賀卽位及進方物及賀
萬春節辛巳金宴夏使貞元殿故事外國使三節人從皆坐廡下
賜食金主察其食不精腆曰何以服遠人之心掌食官皆杖六十
癸未夏使朝辭乞互市從之 秋八月癸酉夏遣使如金賀尊號
九月庚子金以尙書左司員外郎完顏正臣爲夏國生日使

隆興元年春正月壬辰朔夏遣使如金賀 二月庚寅夏又遣使
如金賀萬春節自是以至大定之末歲兩使率以爲常 夏六月
甲申金以宿直將軍阿勒根和爲橫賜夏國使 秋八月戊子金
以宿直將軍僕散習尼列爲夏國生日使

二年秋九月己亥金以宿直將軍烏里雅爲夏國生日使

孝宗乾道元年秋八月夏遣使如金賀尊號 九月庚戌以宿直

將軍朮虎蒲查爲夏國生日使

二年夏四月戊戌金以宿直將軍斜卯擢刺爲橫賜夏國使 秋

九月辛亥金以翰林待制移刺熙載爲夏國生日使

三年秋九月乙亥金以宿直將軍唐括鶻魯爲夏國生日使

四年夏五月夏國相任得敬專政欲謀亂是月遣閒使至四川宣撫司約發兵攻西蕃虔允文報以蠟書 秋九月金以引進使高

希甫爲夏國生日使 冬夏以明年改元乾祐

五年夏五月金以宿直將軍完顏賽也爲橫賜夏國使 秋九月

甲寅朔金以宿直將軍僕散守中爲夏國生日使

六年夏閏五月庚辰月日據金史夏國相任得敬脇其主李仁孝中分

其國請命于金金主不許初仁孝之嗣位也國多內亂任得敬乃仁孝之外王父抗禦有功遂相夏國專政二十餘年陰蓄異志欲

圖夏國誣殺宗親大臣其勢漸偏仁孝不能制得敬嘗遣使至蜀
既而知宋不足恃閏五月庚辰脅仁孝上表於金請分西南路及
靈州囉癭嶺地與得敬自爲國金主以問宰相尙書令李石等曰
事係彼國我何預焉不如因而許之金主曰有國之主豈肯無故
分國與人此必權臣偏奪非夏主本意況夏國稱藩歲久一旦偏
於賊臣朕爲四海主寧容此耶若彼不能自立則當以兵誅之不
可許也乃卻其貢物賜仁孝詔曰先業所傳亦當固守今茲請命
事頗乖常未知措意之由來續當遣使以詢爾得敬始有懼心仁
孝乃謀誅之 秋八月夏任得敬以謀篡伏誅 九月庚寅金以
戶部郎中夾谷阿里補爲夏國生日使 冬十一月癸巳夏以誅
任得敬使金謝金詔慰諭之

七年秋八月金以近侍局使劉琬爲夏國生日使

八年春三月壬午帝謂虞允文曰西夏小邦當時亦白枝梧不及所以馴致丙午之恥夏四月癸亥金以宿直將軍唐括阿忽里爲橫賜夏國使秋七月金罷保安蘭安權場金主謂宰臣曰夏國以珠玉易我絲帛是以無用易我有用也命罷之九月丙子金以右衛將軍粘割斡特刺爲夏國生日使戊寅以虞允文爲四川宣撫使封雍國公己丑允文入辭帝諭以進取之方刻日會師河南允文言異時或內外不甚應帝曰若西師出而朕遲回卽朕負卿若朕已動而卿遲回卽卿負朕

九年秋九月辛卯朔金以宿直將軍胡什麥爲夏國生日使
清熙元年秋九月乙未金以宿直將軍崇肅爲夏國生日使

二年秋九月金以符寶郎斜卯和尚爲夏國生日使

三年春三月丙午朔日有食之夏遣使賀金萬春節改用次日

秋九月金以宿直將軍完顏觀古速爲夏國生日使

四年癸卯金以兵部郎中石抹忽土爲夏國生日使 冬

十月己巳夏國進百頭帳于金金主詔卻之境上 十一月戊戌

有司復奏夏國進御帳使因邊臣懇求進入乃許之

八年春正月壬子金以夏國請互市復綏德軍權場

西夏紀事本末卷三十五

烏程張鑑春治甫著

安全廢立

道熙五年金大定十八年秋九月辛未金以侍御史完顏蒲魯虎爲夏國生日使西夏遣將蒲魯合野攻金麟州至宕遵源有邛都部之酋名祿東賀者密與之通使番僧諦刺者約日爲應兵與戰祿東賀從中而叛與西夏兵首尾夾擊之師燬戊子麟州城陷夏人擄金帛子女數萬毀城而去

六年秋九月金以太子左衛率府率裴滿胡刺爲夏國生日使
七年秋九月壬戌金以少府少監賽補爲夏國生日使

八年春正月壬子金以夏國請復綏德軍榷場詔仍許就館市易
秋八月乙丑金以吏部郎中奚胡失海爲夏國生日使

九年秋九月戊寅金以尚輦局使僕散曷速罕爲夏國生日使
十年秋九月己巳金以宿直將軍完顏斜里虎爲夏國生日使
十一年春二月丙戌金以器物局使尙爲橫賜夏國使 秋八月
癸亥金以侍御史遙里特末哥爲夏國生日使

十二年夏四月丙子邊謀言故遼大石林牙假道夏人以伐金
十三年夏四月辛亥詔吳挺結約夏人 秋八月金以宿直將軍
李遠可爲夏國生日使

十四年秋九月己亥金以武器署令斜卯阿土爲夏國生日使
十五年秋九月甲午朔金以鷹房使崇夔爲夏國生日使

十六年春正月壬辰朔金主大漸夏國賀正旦使未至遣還癸巳
金世宗殂甲辰報哀於夏 三月癸丑夏遣使如金弔 夏四月
夏遣使如金祭 五月壬寅夏遣使賀金卽位 六月乙卯金勅

有司移夏天壽節于九月一日來賀 秋九月戊辰金以隆慶宮
衛尉把思忠爲夏國生日使 冬十二月甲寅夏遣使如金賀正
旦

光宗紹熙元年金明昌元年夏四月丙辰金以鷹坊使移剌爲監
爲橫賜夏國使夏兵寇金嵐州又寇石州 秋八月己酉夏遣使
如金賀天壽節金主以喪次不受朝己未以武衛軍副都指揮使
烏林荅謀爲夏國生日使 冬十二月丁未夏遣使之金賀正旦
二年春正月庚戌朔金諭夏國使可令館內貿易一日尚書省言
故事許貿易三日從之辛酉金皇太后殂丙寅金以左副都點檢
尙等報哀于夏 三月丁巳夏遣使如金弔丁卯夏遣使如金祭
夏五月西夏陷金鄜坊州又攻金保安軍 秋八月乙巳夏遣
使之金賀天壽節丁巳金以西上閤門使白琬爲夏生日使 冬

十一月夏人肆牧于鎮戎之境邏卒逐之夏人執邏卒而去金邊將阿魯帶率兵詰之夏廂官吳明契信陵都卜祥徐餘立伏兵三千於澗中戊午阿魯帶中流矢死金詔夏索殺阿魯帶者夏人處以徒刑索之不已乃殺明契等 十二月癸卯夏遣使之金賀正旦

三年秋八月丁卯夏遣使之金賀天壽節 九月甲戌金以郊社畧合唐括合達爲夏國生日使 冬十二月夏遣使之金賀正旦四年夏五月丙寅金以尙廐局使石抹貞爲橫賜夏國使 秋九月甲子朔金主以天壽節御大安殿受夏及親王百官朝賀戊辰以西上閣門使大畧爲夏國生日使癸未夏國主仁孝殂年七十七在位五十五年國人謚爲聖德皇帝廟號仁宗陵號壽陵仁孝重文學然權臣擅國兵政衰弱子純佑立改元天慶 冬十一月庚

寅夏嗣子李純佑遣使訃告於金十二月甲午朔夏李純佑遣使奉故王仁孝遺表進金甲辰金以西上閣門使大譽等爲夏國勅祭慰問使是歲有亦刺哈走西邊日剽掠以自資旣而亦爲西夏所攻走至龜茲國爲其國人所殺

五年春正月癸亥朔夏遣使如金賀辛巳金遣國子祭酒劉璣冊李純佑爲夏國王 秋九月壬午朔夏遣使之金賀天壽節 冬十月金以引進使完顏衷爲夏國生日使

寧宗慶元元年春正月丁亥朔夏遣使如金賀 秋九月壬午朔夏遣使之金賀天壽節辛卯金以尚書左司郎中粘割胡上爲夏國生日使

二年春正月辛巳朔夏遣使如金賀 夏五月壬辰金以尙藥局副使粘割忠爲橫賜夏國使 秋九月丁丑朔夏遣使如金賀天

壽節乙巳金以國子監丞烏古論達吉不爲夏國生日使

三年春正月乙亥朔夏遣使之金賀、秋九月辛丑朔夏遣使之

金賀天壽節乙巳金以夏使朝辭詔荅許保安蘭州榷場 冬十

月丙申金以禮部員外郎蒙括仁本爲夏國生日使

四年春正月己亥朔日有食之辛丑夏遣使如金賀 夏五月戊

申金以客省使移刺都爲夏國生日使 秋九月丙申朔夏遣使

如金賀天壽節

五年春正月癸巳朔夏遣使如金賀 夏五月壬寅金以兵部郎

中完顏徹里合爲夏國生日使庚申金以宿直將軍徒單仲華爲

橫賜夏國使 秋九月庚申朔夏遣使之金賀天壽節

六年春正月戊子朔夏遣使之金賀 秋九月甲寅朔夏遣使之

金賀天壽節 冬十月丁未金以宿直將軍完顏觀音奴爲夏國

生日使

嘉泰元年春正月壬子夏遣使如金賀 三月乙丑夏國遣使如金謝 秋九月戊申朔夏遣使之金賀天壽節 冬十月甲辰金以刑部員外完顏綱爲夏國生日使

二年春正月丁未夏遣使之金賀 秋九月壬寅夏遣使之金賀天壽節 冬十月壬辰金以宿直將軍紇石烈毅爲夏國生日使瀛王府司馬獨吉溫爲橫賜使

三年春正月辛未夏遣使之金賀 秋九月丙寅朔夏遣使如金賀天壽節 冬十月壬戌金以薊州刺史完顏太爲夏國生日使 四年春正月乙丑夏遣使如金賀 秋九月庚申朔夏遣使之金賀天壽節 冬十月甲寅金以提點尙衣局完顏變爲夏國生日

使

開禧元年春正月己未朔夏遣使之金賀 秋九月甲申朔夏遣使之金賀天壽節 冬十一月蒙古軍聞西夏之警乃回師十二月是歲蒙古奇渥溫鐵木真伐西夏拔力吉里寨經落思城大掠及其寨馳而還

二年春正月癸未朔夏遣使如金賀夏鎮夷郡王安全廢其主純佑而自立純佑殂于廢所年三十諡昭簡皇帝廟號桓宗墓曰莊陵安全崇之孫越王仁友之子純佑兄之子也 秋七月丙申夏鎮夷郡王安全使桓宗母羅氏上表于金言純佑不能自守與大臣定議立安全爲王金主賜羅氏詔詢其意 九月辛丑夏人復以羅氏表來金始命遣尙書左司郎中溫迺罕思敬冊安全爲夏國王 冬十二月是歲蒙古奇渥溫鐵木真稱帝於斡難河號成吉思皇帝西夏改元應天

三年春正月丁丑朔夏遣使如金賀 秋七月乙未金詔覈西夏
人口盡贖放還敢有藏匿者以違制論 九月甲戌朔夏遣使之
金賀天壽節是月蒙古伐西夏克幹羅孩城 冬十二月丙午金
以符寶郎烏古論福齡爲夏國生日使

嘉定元年春正月辛未朔夏遣使如金賀 夏五月西夏遣使求
援于金先是金泰和六年大發兵侵西北諸虜生蕃也鄰接比號
曰驍騎有衆三萬盡數起發侵江南次年罷兵和好如初諸虜還
歸因賞不均皆叛北歸又李藻及午逢辰白綸田廣明皆以上書
言事杖一百四人挈其家亡之北地相與獻謀又有諸虜輸其力
于是元軍益銳恐西夏議其後乃大舉兵攻之至是西夏遣使求
援金主不應其臣僚諫曰西夏旣亡必來加我不如與西夏首尾
夾攻可以進取而退守金主曰敵人相攻中國之福吾何患焉不

聽 冬十月辛巳夏遣使賀金天壽節先是金詔移天壽節於十月故至是始行是時夏國有兵復遣使告金

二年春三月蒙古主入河西夏主安全遣其世子率師拒戰敗之獲其副元帥高令公克兀刺海城俘其太傅西壁氏進至克夷門復敗夏帥獲其將鬼名令公薄其中興府引河水灌之隄決水外潰遂撤圍還遣太傅訛荅入中興招諭夏主安全納女請降于蒙古夏自是益衰 秋七月西夏及北方稻麥皆熟

三年是春西夏始爲元軍所攻遣使求援金國主新立不能救元軍至興靈而反夏人恨之時金國亦爲所擾勢益衰夏人因此遂叛乃改元皇建 秋八月夏侵金葭州夏自天會初與金議和八十餘年未嘗交兵至是爲蒙古所攻求救于金金主永濟新立不能出師夏人怨之遂侵葭州金慶山奴擊敗之而去 九月金納

哈買佳曰近見蒙古諸部附從西夏獻女而造箭制楯非圖我而何

四年春正月乙酉朔夏遣使如金賀西域哈刺魯部主阿昔降于蒙古 秋八月夏國主安全殂年四十二謚爲敬穆皇帝廟號襄宗墓曰康陵族子大都督府主遊頊立改元光定

西夏紀事本末卷三十五

西夏紀事本末卷三十六

烏程張鑑春治甫著

夾攻覆亡

嘉定四年冬十一月金都城受圍夏人連陷邠涇金陝西安撫使檄同知轉運使燕人韓玉以鳳翔總管判爲都統府募軍旬日得萬人藉秦州場買馬官香及鳳翔冒買馬七百寶雞埋沒官鐵他州郡弓弩數千以給軍出屯華亭與夏人戰敗之獲牛馬千餘玉毅然有勤王志因傳檄州郡有云事推其本禍有所基始自賊臣貪容姦賂繼緣二帥貪錮威權既止夏臺之師旋致會河之敗又云齊魏以高壘爲能堅蒲絳以穿空爲得計裹糧坐甲盡膏血於生民棄甲復來竭資儲于國計要權力而望形勢連歲月而守安孛又云命令不至京師奈何盼盼四集之師懸懸半載之上人誰

無死有臣子之當然事至于今忍君親之弗顧勿謂百年身後虛名一聽史臣只如今日目前何顏以居人世王侯將相寧有種乎富貴功名當自致耳時夏兵五萬方圍平涼又戰于北原夏人疑元軍至是夜解去當路者忌其功或誣玉有異志驛奏玉與夏人通謀金人疑之囚玉鞠死郡學獄中 有白馬波者益強起兵攻河西不數年河西州郡悉爲所破又獲夏國公主而去夏人反臣事之

五年春正月夏遣使如金賀正旦 三月金冊李遵頊爲夏國主夏人旋攻金葭州金延安路兵馬總管完顏奴婢禦之時金人方有蒙古之難夏人乘其兵敗侵掠邊境而通聘如故 冬十二月遵頊遣使如金謝封冊

六年夏六月夏破金之保安州及慶陽府 冬十一月戊辰夏入

攻金會州金徒單醜兒出兵擊之 十二月夏取金涇州

七年秋七月夏左樞密使萬慶義勇遣二僧齋蠟書來四川議夾
攻金以恢復故疆時制置使董居誼初入蜀不之報由是虜訊中
絕 八月丁未夏人侵金金移文責之 冬十一月辛未金詔有
司答夏國諜丙子金蘭州譯人程陳僧叛西結夏人爲援

八年春正月乙亥夏人攻金環州 二月辛卯金環州刺史烏古
論延壽及斜卯毛良虎等擊卻之於州境詔進官有差 夏六月

戊子金謀伐夏 秋七月蒙古主駐軍魚兒濼遣三哥拔都帥萬

騎自西夏趨京兆以攻金 九月庚辰金陝西宣撫司來上第五

將城萬戶楊再興擊走夏人之捷壬午以空名宣勅付陝西宣撫

司凡夏人入寇有能臨陳立功者五品以下並聽遷授 冬十月

丁亥夏人攻金保安金都統完顏國家奴破之延安成將又敗之

是日捷至丙午夏陷臨洮金陝西宣撫副使完顏胡失利被執庚戌金詔尚書左丞相僕散端兼都元帥行尙書省于陝西 十一月夏人攻金綏德之克戎寨金人敗之犯綏平又敗之金賞有功將士及來捷者甲戌金移刺塔不也以軍萬人破夏人數萬於熟羊寨丙子金歸德府陀滿胡土門破夏人八萬於城下

九年夏四月丙寅夏人詭俄族都官汪三郎率其蕃戶歸於金以千羊進金詔納之優給其直 五月己巳金來遠鎮獲夏謀者陳昂等知夏人將圖臨洮鞏州窺長安命陝西行省嚴爲之備丙子夏人脩來羌城界河橋金元帥右都監完顏賽不遣兵焚之俘虜甚衆 秋閏七月甲寅夏人入金安寨堡元帥左監軍烏古論慶壽遣軍敗之己卯夏人入金結耶觜川守將擊走之 九月壬辰蒙古攻金代州蒙古織格巴圖魯率師由西夏趨關下 冬十一

月乙酉金元帥右都監完顏賽不奏提控石盞合喜楊幹烈等大敗夏人於定西金命行省視其功賞之 十二月丙寅金皇太子議伐西夏

十年夏四月金主以南北用兵西夏復擾財匱兵弱爲憂集百官議守禦之策 五月戊寅陝西行省破夏人於大北岔是日捷至秋七月甲辰夏人犯金黃鶴岔守將敗之乙巳夏人圍金羊狼寨帥府發諸鎮兵擊走之 九月戊寅夏人犯綏德之克戎寨金都統羅世暉逆擊卻之 冬十二月蒙古圍夏口州夏主遵頊出奔西涼命其子居守

十一年春二月丙午金人破阜郊堡死者五萬人先是安丙嘗納夏人合從之請會師攻秦鞏而夏人不至遂有阜郊之敗 夏五月丙子夏人自葭州入鄜延金元帥承立遣兵救之馬吉峯是日

捷至 秋七月辛未夏人攻龕谷金提控夾谷瑞及其副趙防擊走之甲午夏人復犯龕谷夾谷瑞大破之 冬十一月戊子金龕谷提控夾谷瑞敗夏人於質孤堡

十二年春庚戌金元帥右都監承立以綏德保安之境各獲夏人統軍司文移來上其詞雖涉不遜而皆有保境息民之言詔尙書省議之宰臣言鎮戎靈平等鎮近耗夏人數犯疆場此文正綏我爾宜嚴備禦以破姦計上然其言又曰朕惜生靈惟和議早成爲佳爾 二月乙丑夏人復以書來四川議夾攻金人是時西夏以金兵不應援已折而歸北益懷二心始遣使使于南宋往議夾攻宋安撫丁焞許之 閏三月戊午夏人破金靈州之通秦砦金刺史紇石烈王家奴戰沒 夏四月乙酉夏人據通秦寨提控納合買住擊敗之辛卯夏人犯金通秦砦元帥完顏合達出兵安塞堡

以擣其巢至隆州夏人逆戰守軍擊之衆潰進薄城俄陷其西南隅會日暮還 六月癸巳宋利州路安撫丁焞復以書約夏人伐金 冬十一月癸巳朔金前嵐州倉使張祐自夏國歸金

十三年春正月戊午夏人復以書來四川議夾攻金人 夏四月癸亥夏人侵金金元帥石蓋合喜破之 秋八月庚午夏人陷會

州金刺史烏古論世顯降壬申四川宣撫使安丙遣夏人書定議夾攻金人以夏兵野戰我師攻城癸未遂命利州統制王仕信帥師赴熙秦鞏鳳翔委丁焞節制以會夏人且傳檄招諭陝西五路官吏軍民夏取金會州甲戌金陝西行省報龜谷敗夏人之捷丙子金陝西行省遣使如夏議和 九月辛卯夏人遣其樞密院甯子寧率衆二十萬圍金鞏州且促宋師來會甲午統制王仕信引兵發宕昌乙未統制質俊李質引兵發下城戊戌四川宣撫司命

都統張威等分道進兵張威出天水程信出長道陳立出大散關田胄出子午谷陳昱出上津太白晝見克金來遠鎮繼又克鹽州鎮進攻定邊城金兵往救不利庚子夏人入定西州癸卯夏復侵金乙巳宋程信王仕信引兵與西夏會于金鞏州城下丁未遣董昭等攻城不克宋程信引兵趨秦州己酉夏人陷西寧州壬子程信及夏人攻鞏州又不克安丙命張威出秦州及夏人侵金威謂金人尙強夏人反覆未可輕動丙不聽威勉行至城下無功而還丙辰夏人自安遠砦退師金鞏州行元帥府事石蓋合喜報定西州之捷冬十月丁巳朔程信復邀夏人共攻秦州夏人不從信遂自伏羌城引兵還諸將皆罷兵宋程信以宣撫司之命斬王仕信於西和州張威罷軍職

十四年春正月壬辰金議禦西夏及征南事三月己亥夏因叛

人質趙兒之招入據來羌城金孛朮魯合住以重賞誘脇從人爲
內應督兵急攻城拔之 冬十月壬戌夏人復侵金龕谷丙寅夏
人復以書至四川趣宋會師伐金初蒙古主征西夏太師國王木
華黎從駐青冢大饗將士遂由東勝州涉河引兵而西夏主聞之
遣塔海監府等宴木華黎于河南且遣塔哥甘普將兵五萬屬焉
木華黎引兵東行蒙古將石天應攻葭州拔之金將王公佐道木
華黎攻綏德破馬蹄克戎兩寨夏主遣迷僕帥眾會之迷僕問木
華黎相見之儀曰汝見汝主汝主見我主卽其禮也迷僕曰未受
主命不敢拜因引眾去丁卯夏人犯金定西積石之境 冬十一
月癸未金陝西東路行省報安塞堡敗夏人之捷乙未夏人攻金
龕谷是月木華黎進攻延安迷僕始贖馬而拜西夏世將野蒲首
下率所屬降于蒙古

十五年春二月金賈天安上書有曰請以夏人觀之向日弓箭手之在西邊者則搏而戰袒而射彼已奔北之不暇今乃陷吾城而擄守臣敗吾軍而擒主將曩則畏我如彼今則侮吾如此夫以夏人既非前日奈何視宋人猶如前日哉金主不省癸酉金提控李師林敗夏人于永木嶺金郭文振奏近得俘者言南北合兵將攻河南陝西金詔樞密備禦 秋八月甲申積石州蕃族叛金附于夏癸巳夏人攻金德順旋又掠其神林堡 九月是時元軍自去年收復陝西至是鳳翔邠涇及南山一帶堡寨皆陷 冬十二月己丑金蘭州提控唐括昉敗夏人于質孤壘

十六年秋七月壬寅朔夏人攻金積石州羌界寺族多陷沒惟桑通寺僧看逋昭逋斯沒及答那寺僧奔鞠等拒而不從金詔賞諸酋鈔轄正將等官而給以廩祿丁巳金陰坡族之骨鞠門等叛歸

夏金元帥夾谷瑞發兵討之以捷聞 冬十一月辛酉金鞏州行
元帥府報會州破夏人之捷 十二月蒙古兵攻夏夏主遵頊傳
國于其子德旺遵頊自號上皇德旺改元乾定時蒙古主使史天
祥徇西夏破賀蘭山還遇敵射傷額出血目爲之昏

十七年秋九月先是蒙古主在西域夏國主陰結外援蓄異圖蒙
古主密詔孛魯討之至是攻銀州克之斬首數萬級獲生口馬馳
牛羊數十萬俘監府塔海命都元帥蒙古不花將兵守其要害而
還夏及金平金以夏爲北兵所偪將立新主以翰林趙周臣爲詔
冊使旣遣至界上朝議罷其事飛驛卒追回初夏人與金通好不
交兵者八十年至貞祐初以小故生釁構難十年一勝一負遂至
精銳俱盡兩國皆弊至是夏人請和金馮子駿往議李獻甫預行
夏使有口辯馮無以折之往復之際至以歲幣爲言獻甫曰夏國

與本朝和好百年今雖易君臣之名而爲兄弟之國使兄而輸幣
豈有據耶曰兄弟且不論宋日曾與吾家二十五萬匹典故其在
君獨不知耶金朝必欲脩舊好非此例不可獻甫作色曰使者尙
忍言之耶宋以歲幣餌君家而賜之姓岸然以君父自居夏國君
臣無一悟者誠謂使者當以爲諱乃今公言之使者果能主此議
以從賜姓之例敝邑雖歲捐五十萬無不可某請以身任之使者
語塞和議乃定夏以兄事金遣其吏部尙書李仲諤脩好于金各
用本國年號來聘奉國書稱弟

理宗寶慶元年冬十月金以夏國脩好詔中外新軍政癸亥遣禮
部尙書與敦良大理卿裴滿敘甫侍御史烏古孫宏毅爲夏國報
成使國書稱兄是月蒙古鐵木真伐夏取甘肅州西涼府 十一
月取靈州進次鹽川州以西夏納仇人亦膺喝翔昆及不人質子

也有守納刺城者夏主之子也城陷不屈而死子惟忠方七歲求從父死蒙古將異之執以獻其宗王合撒兒王留養之李恒其後也

二年春正月丁巳朔夏國遣使如金賀正且蒙古主鐵木真以夏納仇人又不遣質子自將兵伐西夏取黑水等城 三月夏主父遵頊殂年六十四諡曰英文皇帝號曰神宗 夏五月蒙古主避暑于渾垂山取夏甘肅等州蒙古有察罕者父曲也怯律爲夏臣其妾方懷察罕不容於嫡母配以掌羊事者及長武勇過人爲蒙古主所知及從攻西夏破肅州師次甘州察罕父曲也怯律居守城中察罕射書招之且求見其弟時弟年十三命登城于高處示之且遣使諭城中使早降其副阿綽等三十六人各謀殺曲也怯律父子併殺使者并力拒守及城破蒙古主欲盡坑之察罕言百

姓無辜止罪三十六人 秋七月蒙古主取夏西涼府擗羅河羅等縣夏掌國史寧州幹札箠守西涼率父老以城降遂踰沙陀至黃河九渡取應里等縣夏國主德旺驚悸而卒年四十六號曰獻宗國人立其弟南平王暉以兵事方殷告于金各停使聘 冬十月丁酉夏遣使報哀於金 十一月庚申蒙古主進攻夏靈州夏遣鬼名令公以十萬衆來援丙寅蒙古主渡河擊夏師敗之甲戌金遣使之夏國賀正且丙子夏以兵事方殷報金各停使聘蒙古主駐鹽州還次六盤夏人堅守中興蒙古主遣察罕入城諭以禍福金遣中大夫完顏履信爲弔祭夏國使 十二月金人聞夏師屢敗召諸臣議兵事西夏改元寶慶

三年春正月蒙古主留兵攻夏王城自率兵渡河攻金積石州夏六月戊申朔日有食之蒙古鐵木眞盡克夏城邑其民穿繫土

石以避鋒鏑免者百無一二白骨蔽野蒙古主避暑于六盤山仍命阿朮魯總兵與賜銀印懷都等與敵大戰于合刺合察兒之地踰月夏國主覲力屈出降遂繫以歸太宗殺之時議屠中興察罕力諫止之馳人安集遺民蒙古太祖因命以夏主遺物盡賜懷都夏立國凡二百餘年抗橫宋遼金元四國徇鄉無常視四國之強弱以爲異同至是乃亾元諸將多掠子女財帛耶律楚材獨取書數部大黃藥物兩駝而已是時實金之正大四年元太祖之二十有二年也進士高智耀西人也世仕夏國夏亾隱賀蘭山中元太宗訪求河西故家子弟之賢者得之元史自有傳

西夏紀事本末卷三十六終